

## DBP Sabah, MBSS hantar wakil ke pertemuan sastra BIMP-EAGA di Kuching

KOTA KINABALU: Dewan Bahasa dan Pustaka Cawangan Sabah dan Majlis Bahasa dan Sastra Sabah (MBSS), akan menghantar wakilnya ke Pertemuan Budayawan BIMP-EAGA ke-2 di Kuching pada 8 hingga 12 Oktober ini.

Presiden MBSS, Datuk Sapawi Haji Ahmad, dijangka membentangkan kertas kerja mengenai tradisi sastra di wilayah BIMP-EAGA terutama dalam konteks memperkukuh hubungan ekonomi dan sosial.

Turut membentangkan kertas kerja pada pertemuan itu ialah penggiat sastra, Jasni Matlani dan Asmiaty Amat dari Universiti Malaysia Sabah (UMS).

Pertemuan anjuran Dewan Bahasa dan Pustaka Cawangan Sarawak itu akan mendedahkan penulis, aktivis sastra dan budaya di wilayah BIMP-EAGA kepada perkembangan sastra yang lebih luas, selain mengukuhkan lagi hubungan kerjasama semua negara terlibat menerusi sastra dan budaya.

Program yang bakal berlangsung Merdeka Palace, Kuching itu turut menyenaraikan beberapa acara lain termasuk Pengucapan Puisi Kota-Kota Dunia yang bakal menyaksikan penglibatan beberapa penyair terkemuka dunia termasuk dari Malaysia.

Pertemuan sastra dan budaya ini adalah yang kedua terbesar di wilayah BIMP-EAGA tahun ini selepas Festival Sastra Perpaduan anjuran bersama Kerajaan Negeri Sabah, MBSS dan GAPENA, tidak lama dulu.